

門若無於相則無願求名無願解脫門如是大王
切法皆具三解脫門與空共行涅槃先道遠離於相
遠離願求究竟涅槃界決定如法界周徧虛空際大
王當知諸根如幻境界如夢一切譬喻當如是知大
王猶如夢中與怨共鬪喻見不愛色生瞋又云夢中
爲鬼所燒喻捨處色生執着更於聲香味觸法皆說
三喻喻愛憎捨顛倒心業悉如上文正同二習相交
蓋一生善惡依根所作納種在識六道業種既未全
空隨強牽報如智論引分別業經云佛告阿難行惡
人好處生行善人惡處生阿難言是事云何佛言惡

人今世罪業未熟宿世善根已熟以是因緣故今雖
爲惡而生好處行善人生惡處者今世善未熟過世
惡已熟以是因緣故今雖爲善而生惡處或臨死時
不善心心所法生是因緣故亦生惡處問曰熟不熟
義可爾臨死少許時心云何能勝終身行力答曰是
心雖時頃少而心力猛利如火如毒雖少能成大事
是番死時心決定猛健故勝百歲行力是後心名爲
大心以捨身及諸根事急故如人入陣不惜身命名
爲健如阿羅漢捨是身著故得阿羅漢如是等種種
罪福業報轉報亦應如是知又如茉莉夫人一生戒

施功德臨終小墮墮蝎中七日然後捨報生天無聞
比丘以四禪爲四果四禪中陰已現邪見謗佛遂感
阿鼻中陰來迎皆在臨終轉念間有漏三學旣未足
恃違情順法得力不得力驗之平日操持百丈大師
云如今截斷一切有無聲色流過心如虛空相似合
與麼學如救頭然始得臨命終時尋舊熟路行尚不
徹到與麼時新調始學無有得期臨終之時盡是勝
境現前隨心所愛重處先受祇如今不作惡事當此
之時亦無惡境縱有惡境亦變成好境若怕臨終之
時悖狂不得自由卽須如今便自由始得祇如今於

一一境法都不愛染亦莫依住知解便是自由人如
今是因臨終是果果業已現如何怕得又云對五欲
八風情無取捨愛憎情盡知見不生如香象渡河截
流而過此人天堂地獄所不能攝圭峰大師亦云狂
亂隨情念臨終被業牽醒悟不由情臨終能轉業故
指六道升墜差別悉由汝心情想重輕未得倒情盡
絕皆不免四惡趣苦報

衆生無始業種自然如惡义聚無生見生悉同夢幻
若執權乘本有新熏爲實全昧染熏不斷枉入遺明
之由故明此惑本悉屬習氣所謂陀那微細識習氣

成暴流也唯須陀洹聖人名爲入流而無所入始證
離諸惡趣三昧未登初果以還各具十二顛倒猶如
捏目亂華發生皆視爲固然任其起滅寧知卽是無
量無邊衆大苦聚法華火宅喻於百八煩惱廣列情
狀今以圓數總攝根隨令知惡趣之門開閉悉由於
此蓋六識造業咸依於根故所招惡報悉從根出修
道分云根中積生無始虛習意指六根卽具八識含
藏無量善惡種子是爲輪轉結心已潤受生報未潤
受後報若得對治及悔所損始不受報前答滿慈明
風金水火之輪咸因相待生勞勞久發塵自相渾濁

故今從猛火鐵床以迨惡友業鏡種種苦具皆依妄
習所生如交接交計相磨相吸皆根境相涉和合而
起卽相待成勞此指習因二習相然乃至相排相陳
皆前後相因承襲卽勞久發塵此指習果真修行者
若以之照心有無輕重各各自知一切苦報莫不起
於惡業一切惡業莫不起於十使十纏如來逐一指
果明因推因驗果有時因中說果有時果上說因意
顯所受苦樂無非過去自作所起惑業感報未來不
虛惡因雖微惡果實巨姪習未斷非但鐵床銅柱之
獄不免餘惡趣中一切因姪所感苦具悉不能免貪

習未絕非但八寒苦聲苦色之獄不免餘惡趣中一切因貪所感苦具悉不能免姪但舉火聚貪但舉寒冰實則血河刀山等苦無不悉具餘八種習亦復如是又一習未空諸習具在華嚴云一念瞋心起百萬障門開天台亦云一有業盡餘有業未必盡此是別教義一趣無明煩惱空一切趣無明煩惱皆空始是圓頓義餘經一因祇言一果或言果不言因或言因不言果未若此中三惡相藉輕重疊陳盡顛倒情窮苦果量各各六根卽是別業入同受地卽是同分以此惡習非一生一劫熏染而成若得繩未斷六交之

報何由解脫正觀初漸次暨他觀觀陰文中皆言墮無間獄正顯此義善觀煩惱者不以煩惱視煩惱而以一切三惡極重苦報視此煩惱夫煩惱本卽般若煩惱所結之業本卽解脫所感之報本卽法身二修旣明七趣衆生皆同十方如來及大菩薩證三德矣六交卽六亂妄想成業性故一根造業五根必隨因說六亂果亦六亂一各徧六地水火風各依徧勝互相陵滅遂成種種劇苦雜華云譬如汝等昔在地獄地獄及身非十方來但由於汝顛倒惡業愚癡纏縛生地獄身此無根本無有來處見報招火聞報招水

映前選圓通觀聽旋復設入水火不能燒溺彼乃根
解塵亡一受不退此則依根造業增長無休所感苦
樂一一相違以此皆是法界大用故迷妄之力亦同
真體不思議問阿鼻乃至一百八地獄其相云何答
阿鼻獄相廣如觀佛三昧海經餘獄并鬼畜之相三
乘教中具載如十住毘婆沙云地獄畜生餓鬼人天
阿修羅六趣險難恐怖大畏是衆生生死大海旋流
洄復隨業往來是其濤波涕淚乳汁流汗膿血是惡
水聚瘡癩乾枯嘔血淋瀝上氣熱病癩疽癰漏吐逆
脹滿如是等種種惡病爲惡羅刹憂悲苦惱爲水獄

動啼哭悲號爲波浪聲苦惱諸受以爲沃焦死爲崖
岸無能越者諸結煩惱有漏業風鼓扇不定諸四顛
倒以爲欺誑愚癡無明爲大黑闇隨愛凡夫無始以
來常行其中如是往來生死大海未曾有得到於彼
岸又輒心者於活地獄黑繩地獄衆合地獄叫喚地
獄大叫喚地獄燒灸地獄大燒灸地獄無間大地獄
及眷屬炭火地獄沸尿地獄燒林地獄劔樹地獄刀
道地獄銅樞地獄刺棘地獄鹹河地獄其中斧鉞刀
稍矛戟弓箭鐵剗椎棒鐵槍蒺藜刀劔鐵網鐵杵鐵
輪以如是等治罪器物斬斫割刺打棒剝裂繫縛枷

鎖燒煮拷掠磨碎其身擣令爛熟狐狗虎狼師子惡
獸競來齧掣食噉其身烏鴉鷲鷲鐵漿所啄惡鬼驅
逼令緣劔樹上下火山以鐵火車加其頸領以熱鐵
杖而隨捶之千釘釘身刻刀刮削入黑闇中燧焯臭
處熱鐵鑠身齧割其肉剝其身皮還繫手足鑊湯涌
沸泡煮其身鐵棒棒頭腦壞眼出貫著鐵錐舉體火
然血流澆地或沒尿河行於刀劔槍刺惡道自然刀
劔從空而下猶如駛雨割截支體辛酸苦臭穢惡之
河浸漬其身肌肉爛壞舉身墮落唯有骨在獄卒牽
拽蹴踰搥撲有如是等無量苦毒壽命極長求死不

得若見若聞如是之事何得不怖求聲聞辟支佛乘
又於寒冰地獄頹浮陀地獄尼羅浮地獄阿波波地
獄阿羅羅地獄阿睺睺地獄青蓮華地獄白蓮華地
獄雜色蓮華地獄紅蓮華地獄赤蓮華地獄常在幽
闇大怖畏處謗毀賢聖生在其中形如屋舍山陵埕
阜麤惡冷風聲猛可畏悲激吹身如轉枯草肌肉墮
落猶如冬葉凍剝瘡痍膿血流出身體不淨臭處難
忍寒風切冽苦毒辛酸唯有憂悲啼哭更無餘心號
咷笑獨無所依恃斯罪皆由誹謗賢聖其輒心者見
聞此事何得不怖求聲聞辟支佛乘又於畜生猪狗

野干猫狸狢鼠獼猴狒猻虎狼師子兕豹熊羆象馬
牛羊蜈蚣蚰蜒蛇蝮蠍龜魚鼈蛟虵螺蚌鳥鵲
鷄梟鷹鷂之類如是鳥獸共相殘害又弮網伺捕屠
割不一生則羈絆穿鼻絡首負重捶杖鈎刺其身皮
肉破裂痛不可忍烟熏火燒苦毒萬端死則剝皮食
噉其肉有如是等無量苦痛其輒心者見聞此事何
得不怖求聲聞辟支佛乘又於鍼頸餓鬼火口餓鬼
大瘦餓鬼食吐餓鬼食盪滌餓鬼食膿餓鬼食屎尿
餓鬼浮陀鬼鳩槃荼鬼夜叉鬼羅刹鬼毘舍闍鬼富
單那鬼迦羅富那鬼等諸鬼鬚髮蓬亂長爪大鼻身

中多蟲臭穢可畏衆惱所切常有慳嫉饑渴苦患未
曾得食得不能咽常求膿血屎尿洩唾盪滌不淨有
力者奪而不得食裸形無衣寒熱倍甚惡風吹身宛
轉苦痛蚊蟲毒蟲咬食其體腹中饑熱常如火然其
輒心者見聞此事何得不怖求聲聞辟支佛乘又於
人中恩愛別苦怨憎會苦老病死苦貧窮求苦有如
是等無量衆苦及諸天阿修羅退沒時苦其輒心者
見此諸苦何得不怖求聲聞辟支佛乘若堅心者見
地獄畜生餓鬼天人阿修羅中受諸苦惱生大悲心
無有怖畏作是願言是諸衆生深入衰惱無有救護

無所歸依我得滅度當度此等以大悲心勤行精進
不久得成所願是故我說菩薩諸功德中堅心第一
問指二習爲習因習果六交爲報果更有文證否答
法華玄義釋如是因爲習因如是果爲習果摩訶止
觀亦然第四觀業相境文云行人無量劫來所作善
惡諸業或已受報或未受報若平平運心相則不現
今修止觀能動諸業故善惡相現又云業發相者發
無前後其相有六一報果相現二習因相現三報前
現習後現四習前現報後現五習報俱時現六前後
不定云何名習因習果阿毘曇人云習因是自分因

習果是依果又習各習續自分種子相生後念心起
習續於前前念爲因後念爲果此義通三性論家但
在善惡無記無習續也荆溪云言習果是依果者依
於習因而有習果卽等流果以約刹那釋習果故故
約前後念明之判三性者從刹那說耳若始終說者
卽無漏果不通三性報因報果者此就異世前習因
習果皆名報因此因牽來果名爲報因後受五道身
卽是報果就今果報身上復起善惡習續習因習果
總望前世此習續是果若望後世此習續是因荆溪
云旣合習因習果以爲報因當知名雖有四但成三

義但以二習望於來報復受因名論家復釋習因習
果隔世所起同類習果以此二習望後名因望前名
果是則因果之上復立因果望前因之與果俱名爲
果望後則因之與果俱名爲因此亦有漏故約三世
此與毘曇二釋不同彼論二釋俱不望於三世數家
明報得雀鴿身是報果多姪是習果論家鴿身及多
姪俱是報果姪由貪起貪是習果荆溪云更明數家
與論判報果習果小異雖判多姪所屬不同釋義亦
與論家不別數依毘曇論依前釋又今生煩惱起名
習因成業卽報因後生煩惱起名習果苦痛名報果

荆溪云論家重釋少異前解二因二果悉皆隔世約
於成業未成業等以判習因報因約於隔世重起以
爲習果酬前世報名爲報果此之四名則有四義不
同前釋但成二義按此則二習是習因習果發於相
磨卽習因研磨不休卽習果是爲相然習因習果俱
名報因此因牽來果故十習皆名爲因卽報因義受
五道身卽報果六交報卽報果義觀煩惱中亦云習
因種子無量劫來煩惱重積種子成就熏習相續如
駛流水卽無始業種自然生死相續義故云除奢摩
他及佛出世不可停寢

鬼畜二趣皆十習餘習六交餘報具叙本因貪物物
銷報盡所謂鬼神沉幽愁之苦鳥獸含獠狻之悲同
於地獄皆名無暇也唯於人趣始言酬足復形正可
整心慮趨菩提也仙趣不依正覺修三摩提卽心愛
長壽未達色空故云不修三昧也六欲諸天澄瑩生
明卽修未到定心迹尚交未離婬火也向上漸伏諸
漏從此逮終四禪四空卽諸修學人現前九次第定
若修無想若入四空逃漏無聞卽墮外道若故留惑
卽墮波旬皆由執此生死妄想誤爲真實不得漏盡
故云凡夫業果若自五那含窮入四空成不迴心墮

不成增進小果此皆迷真入岐而漏無漏別若於捨
心發明智慧成阿羅漢入菩薩乘此方捨小向大若
得妙發三摩提此則從岐入真卽同破陰受盡上歷
聖位亦卽同證果得無生法忍若乘此心開卽同十
方三世如來梵住天住同此四禪入定凡聖小大從
因至果該收二觀豈非迷正入邪從邪歸正但在一
念法無差別差別在人問何以更開仙趣答因會中
有聖仙童子故如大威燈光仙及遮羅迦波利婆羅
闍迦外道如來爲說六道餘習各各不同可驗曾在
何趣命終來此皆以人趣爲本故知人趣攝經文分

配顯然太威燈光仙人所問經云衆生業持猶如流星各各別異云何得成真實聚集佛言無時方處持得聚集過二乘已若菩薩地方得聚集無餘涅槃方得聚集如百川歸海又云我雖說煩惱平等中得聚集亦非聚集如風吹蟲聚在一處風息還散衆生亦爾業風吹聚地獄餓鬼等處業盡還散又問意云先同在六道後人中相遇云何得知先來聚集佛言大仙人若相見時心不歡喜生嗔結恨或時頭痛或時失禁大小便利當知是輩已於地獄曾聚集相各相見時結成瞋怨常見其便卽畜生中曾聚集相若餓

鬼來常樂臭穢復多貪食設欲與他心不去離心惱貪著或復見彼富貴勢力心生嫉妬復常欲得彼人財物若有先世同在人中若相見時更生欲心若有先世共在天中若相見時各以眼道遠相攝取共相眷愛大寶積經遮羅迦波利婆羅闍迦外道品佛語外道如我所說三法和合而得受胎我今當說汝等外道一心諦聽當爲汝等說受胎法門外道我言母者是過去作業緣我言父者是過去作業因我言乾闥婆者謂是業招識外道我言迦羅邏者謂是業安置外道我言母腹者業安識依處所識住腹已生得

增長漸漸廣濶外道譬如藥草叢林依於大地而得
增長漸漸廣濶外道如是彼識入母腹已增長廣濶
亦復如是彼母腹中嬰孩成長方得產生生已漸增
既得長大行宿時性隨終來處彼過所行此現習起
彼是智知非愚能了其住交友常恆觀察方知其性
彼人若從地獄終來生人中者當有是相其聲嘶破
驟聲忽急聲怖畏聲高聲淺聲小心常怖數數戰悚
其毛數豎夢中多見大火熾然或見山走或見火聚
或見釜鑊沸涌或見有人執杖而走或見已身爲鉞
稍所刺或見羅刹女或見群狗或見群象來逐已身

或見已身馳走四方而無歸處其心少信無有親友
彼人若從畜生終來閻鈍少智懈怠多食樂食泥土
其性怯弱言語不辯樂與癡人而爲知友喜黑闇處
愛樂濁水喜嚙草木喜以脚指刻掘於地喜樂動頭
驅遣蠅蟲常喜昂頭欠坎空噍常喜蹠脚隨宜卧地
不避穢汗常喜空嗅喜樂裸形常喜虛詐異言異作
多喜綺語夢泥塗身或夢已身於田野食草或夢已
身爲衆蛇纏繞或夢已身入於山谷叢林之中彼人
若從餓鬼終來其頭髮黃怒目直視常喜饑渴慳貪
嫉妬喜饒飲食喜背說人身體饒毛眼睛光赤多思

衆食貪樂積聚不欲割捨不樂見善人所見財物其
心欲盜乃至得其少許財物即便欣喜常求財利樂
不淨食見他資產便生嫉妬復於他財生已有想見
他受用便生悋惜聞說好食心生不樂乃至巷路見
遺落果及以五穀便生貪心採取收斂若從阿修羅
終生人中者高心我慢常喜忿怒好樂鬪諍挾怨不
忘起增上慢其身洪壯眼白如犬齒長多露勇健大
力常樂戰陣亦喜兩舌破壞他人疎齒高心輕慢他
人所造書論他人雖知語巧微密亦有智力及煩惱
加樂自養身若從人終還生人中者其人賢直親近

善人毀訾惡人好惜門望篤厚守信樂好名聞及以
稱譽愛樂工巧敬重智慧具慙羞耻心性柔輒識知
恩養於善友所心順無違好喜捨施知人高下善觀
前人有益無益善能答對領其言義善能和合亦能
乖離善能作使宣傳言語於種種語能善通達憶持
不忘亦復能知是處非處若從天中終生人間者爲
人端正樂好清淨喜著華鬘及以香熏樂香塗身常
喜洗浴所樂五欲揀擇好者不喜於惡喜樂音聲及
以歌舞純與上人而爲交友不與下人而爲朋黨好
喜樓閣高堂寢室樂慈爲道含笑不瞋吐言柔美言

語善巧令人喜悅喜樂瓔珞及好衣服嚴身之具常
樂出入行來暢步所作精勤終不懈怠外道若善男
子若善女人欲超此相應近善知識順彼人意彼所
作者卽隨作之彼善知識令彼超度爲其說法外道
從地獄終生人間者地獄以前作人身時造諸過惡
起瞋恚故便作殺害以業牽墮地獄彼在地獄受種
種苦後生人間猶有習氣旣知是相自知我從地獄
來生人間爲捨地獄因緣應求善知識彼善知識爲
除瞋業故說慈悲亦說慈悲相應助道以此等行能
除餘殘習氣地獄因緣或說慈悲相應尸波羅蜜斷

除瞋恚過惡是人修慈悲時六波羅蜜當得滿足從
畜生終來生人間者積習愚癡應當自知爲捨畜生
行故應求知識爲捨愚癡業說十二因緣以是法故
愚癡得除或說般若波羅蜜愚癡自離便生智慧從
餓鬼終生人間者積習慳貪應當自知爲捨餓鬼行
故應求善知識爲說布施以是法故慳貪得除或說
與施相應助菩提法令其慳貪悉得斷除或說檀波
羅蜜是人修行檀波羅蜜故六度得滿或說一切法
皆悉平等以修法平等故般若波羅蜜得滿流注趣
向一切智處阿修羅終生人間者多作善根行於憍

慢而作諸業當須自知爲捨修羅行故應求知識爲
除憍慢業故爲說聖住處令除憍慢或說空法門令
慢業得除亦除吾我得無我解或說因緣和合故有
諸法以和合故而有所作若無和合亦無所作作是
觀已慢使及業悉得除斷或說諸法一相修行彼故
般若波羅蜜得滿於人中終生人間者修行積習十
善業道應當自知宿習應求知識說無常想令除習
氣或說生死過患涅槃至樂聞此法已厭生死過欣
涅槃樂或說六波羅蜜發無上菩提心或說善方便
卽能堅持六波羅蜜從天中終生人間者所修梵行

布施持戒皆希來報積習作業應當自知宿習應求
知識修持梵行不期來報說於求報是其過惡但爲
顯說淨修梵行無所依著得福無量教行布施持戒
忍辱精進禪定智慧悉然或說善巧方便能行六波
羅蜜漸得滿足速證一切智終不退轉外道從地獄
終得人身者彼應依善知識聽三世佛平等法發勤
精進依城邑聚落與大衆共居具四部處更互論量
佛法學問難答三世法平等得現在前解一切法無
有自性煩惱漸除外道從畜生中終生人間者彼應
依善知識親近多聞斷除愚癡雖復求多聞人及諸

經論作非有想自然解證無自性法以此三世法平等自然現前外道從餓鬼終生人間者彼應依善知識修行布施除其慳貪作諸功德以修捨故心不積聚以此三世法平等自然現前作一相解所言一相卽是無相外道從阿修羅終生人間者彼應依善知識與煩惱魔戰何者是煩惱魔所謂憍慢應當觀察何者是慢是其誰慢誰受是慢誰以此慢起煩惱使誰捨此慢如是推求無慢可得亦不見有人攝受慢者無慢可得無起慢者與慢相應境界亦不可得亦不見有人能捨慢者如是觀已無一法可得復作是

觀以惡攝受自誑已身他亦如是作是觀時能見諸法悉無自性見法非有知不成就知卽不生知彼不滅彼非可說則非過去非現在非未來若法三世不可得者當知未曾有得有失外道當知此是一切法平等當知一切法是真如不變不異如來亦真如不變不異以一切法卽是真如是故觀慢得知是人從人中終得生人間以有憍慢習氣力故乃至從彼地獄中終得生人間以慢習故得知此相若無慢習不可得說此從人來乃至此從地獄中來外道此名離慢智慧彼相要以具巧方便乃能得知又爲般若波

羅蜜加持此人方乃得知爾時八千諸外道等聞說此法得無生法忍問曾墮者可如是比知當墮及生人天者亦可比知否答此如守護國界主陀羅尼經摩揭陀國主阿闍世王復白佛言世尊如佛所言諸惡衆生入於地獄云何得知誰人曾見復云何知當墮餓鬼及與畜生當生人天並誰人見爾時世尊告阿闍世言大王應當一心諦聽我爲王說令王現前而得知見大王當知若人命終當墮地獄有十五相一者與自夫妻男女眷屬惡眼瞻視二者舉其兩手捫摸虛空三者善知識教不相隨順四者悲號啼泣

嗚咽流淚五者大小便利不覺不知六者閉目不開七者常覆頭面八者側卧飲噉九者身口臭穢十者脚膝顫掉十一鼻梁欹側十二左眼睜動十三兩目變赤十四仆面而卧十五蹠身在脇著地而卧具十五相決定當生阿鼻地獄若復有人臨命終時有八種相當知必墮燄摩羅界餓鬼趣中一者好舐其脣二者身熱如火三者常患饑渴好說飲食四者張口不合五者兩目乾枯如鵬孔雀六者無有小便大便遺漏七者右膝先冷八者右手常拳何以故心懷慳吝乃至於水不與人故若具八相命終決定生餓鬼

中若復有人臨命終時有五相現是人決定墮畜生
趣一者愛戀妻子貪視不捨二者蹠手足指三者徧
體流汗四者出麤澀聲五者口中齟沫若具此五命
終決定墮畜生趣若復有人臨命終時有十相現是
人決定生人趣中一者臨終生於善念謂生柔軟心
福德心微妙心歡喜心發起心無憂心二者身無痛
苦三者少能似語一心憶念所生父母四者於妻子
男女作憐愍心如常瞻視無愛無恚耳欲聞於兄弟
姊妹親識姓名五者於善於惡心不錯亂六者其心
正直無有諂誑七者知於父母親友眷屬善護念我

八者見所營理心生讚歎九者遺囑家事藏舉財寶
示之令出十者起清淨信心請佛法僧對面歸敬言
南謨佛陀南謨達摩南謨僧伽我今歸依若無佛世
皈五通仙具此十相決定得於人趣中生若復有人
臨命終時有十種相定得生天一者起憐愍心二者
發起善心三者起歡喜心四者正念現前五者無諸
臭穢六者鼻無欬側七者心無恚怒八者於家財寶
妻子眷屬心無愛戀九者眼色清淨十者仰面含笑
想念天宮當來迎我具此十相決定生天大王如是
臨終善惡之相汝應當知問若已作業應墮惡趣者

亦可懺悔求出離轉重作輕脫此苦報否答卽彼經
次文時阿闍世王聞佛說已竊自思念如來此說爲
是實事爲是虛耶世尊具足辯才權說此理爾時如
來知阿闍世王心之所念卽以神力令阿闍世王見
其惡相忽有地獄苦器充滿有諸獄卒執持苦具無
量衆生顛墜地獄如駛雨點爾時獄卒瞋目振威指
阿闍世而作是言此是惡逆殺父之人速當擒來付
於阿鼻大地獄中而苦治之時阿闍世聞是語已極
大惶怖身毛皆豎徧體汗流遽從座起走欲逃竄悶
絕躡地都不覺知譬如猛風伐無根樹久而不蘇乃

以種種方宜救之漸得蘇息連聲唱言世尊世尊願
賜壽命願賜壽命如我今日無依無怙從今決定歸
佛法僧於是如來還攝神力諸相不現問阿闍世言
大王向見入地獄者諸苦事耶時阿闍世含悲答言
我今已見世尊所說舉其少分我向所見苦事甚多
如來世尊是真語者是實語者世尊我於此身造諸
惡業今對世尊諸大菩薩衆僧大會 **懺悔止息**
諸惡斷相續心我從今日乃至菩提誓持五戒爲優
婆塞如佛所說一字陀羅尼一切功能以菩提心而
爲先導從今向去一日三時精勤修習以此善根悉

皆迴向一切衆生佛讚王言善哉善哉大王諦聽我
今爲王說過去佛微妙伽陀卽說偈言若造五逆極
重罪發露懺悔罪輕微永斷相續滅罪根如壯夫拔
連根樹佛說偈已復告王言大王當知譬如團鐵投
水沉沒若爲鉢器置水則浮大王有智慧人如彼鉢
器不沉苦海汝造惡業合入阿鼻大地獄中一劫受
苦由汝有智發露懺悔入便出如壯男女以手拍
毬蹶時著地卽便騰起從此命終生兜率天見慈氏
尊便得受記時阿闍世聞佛說已心得淨信以種種
供具供養佛已還復本座當於如來說此法時無數

俱胝那由佗衆生皆發阿耨多羅三藐三菩提心三
十二俱胝那由佗菩薩得隨順忍永斷相續滅罪根
卽依善無作除惡無作後念不續則非習果不成報
因故免報果未出輪迴者從於今日止息諸惡誓持
五戒發菩提心求生兜率見慈氏尊自得離苦趣生
天蒙記莚也問一切衆生三界輪迴依何法修始能
免此答華嚴經十地品第六地云三界受生皆由著
我若離此著無有生處天親作二量釋輪轉證寂悉
由於此疏云論主反徵惑情顯成無我初徵著我明
凡應同聖過云若第一義中實有我相者此按定所

執著我之心卽是第一義智此反以縱立謂稱實我知故次云不應世間受身處生者以理正徵謂若我是滅理著心是道則凡應同聖得於涅槃何以著我世間受生耶此中應爲立過云若第一義中實有我者凡應同聖爲立宗以有能證第一義中實我智故爲出因如諸生盡聖人爲同喻此則凡應同聖凡既同聖卽無凡夫復成一過次反徵後句明聖應同凡過云又復若第一義中實有我相者若離著我應長生世間以不稱實同於妄執非第一義智故此中應爲立過云以理實有我聖應同凡爲宗次聖證無我

違理倒惑非聖智故爲出因如諸凡夫爲同喻此則結成聖應同凡過聖既同凡則無聖人復是一過是以經云若離此著則無生處則反顯妄情定是過也二過旣成則無我理昭然可見本無我法卽一切衆生實本真淨二執現前卽因彼妄見有妄習生故云不遇如來不聞正法於塵勞中法爾輪迴門現在五果酬過值佛聞法解脫之相答三際輪迴門現在五果酬過去二因現在三因感未來二果今文雖但列須彌山形一類世界而生滅門不覺流轉是同有漏衆生必具過去無明現在愛取若非前後際分別滅安能頓

了生死經云復次無明緣行者是觀過去識乃至受
是觀現在愛乃至有是觀未來於是以後展轉相續
無明滅行滅者是觀待斷疏云第六三際輪迴門初
約相諦名護過觀謂說三際護三過故三際不同諸
教三說一依唯識合能所引開能所生故前十現在
後二未來十因二果定不同世因中前七與愛等三
或同或異謂生報定同後報便異若二三七各定同
世如是一重因果足顯輪轉及離斷常此則但以二
世具十二支不許三世兩重因果若爾云何三際今
之二果乃是前際十因之果二依智論俱舍生引俱

開初二過去次八現在後二未來故成三世現入之
中前五果酬於過去後三是因復招未來則二重
因果各具三道可得抗行三依此經意明三世故開
能所引爲前中際爲遮前七定同世故復示無明迷
本際故二屬過去吞能所生總爲後際爲遮愛等但
是潤故示因招果令狀因故以因從果五屬未來則
能所引生及所發潤皆容互有經無生死者同許爲
果畧不明之論經具也明文昭然何爲唯取二世不
受三耶已知大意次正釋文文有順逆順中有二先
明一往三世後於是下明流轉三世今初云無明緣

行是觀過去者觀有二義一觀現在生是過去二因所作二則知識等是彼過去當來之果因果相屬反覆相成如是方名見過去因義能防三過言識乃至受是觀現在者亦有二義一觀現在識等由過業得二復知識等能得未來果報以不得對治依起愛等故現在目睹故分兩向明其二義言愛乃至有是觀未來者此未來因決得來果一往定故二流轉三世者謂不得對治復有後世於後世上轉生後世後後無窮已知三際云何護過謂外與內因緣之法立三種過一者一切身一時生過何以故無異因故此過

從前自因而生謂既無自在等而爲異因唯無明行爲識等因行有種種何以不得六道齊生二者自業無受報過何以故無作者故此過從於無作緣生作者卽我三者失業過何以故未受果報業已謝故此過從於無常緣生此上辨過云何護耶若見三際則能護之然過去業有三種義故不得報一未作二作已未潤三得對治今無明緣行則顯已作現識等五則顯已潤已受愛取有三則知未得對治於已作業既有潤未潤殊斯爲異因已潤則受生報未潤則受後報潤未潤殊豈得六道一時齊受此爲異因何用

自在既自造異因自招二報非他身受何言自業無
受報耶假者自造何用我耶若已作業不得對治潤
則便生知業不失因雖先滅勢力續故現見得報不
可言失三過度矣後無明滅下逆觀卽得對治義此
滅則彼滅是觀待斷又因觀能滅揀自性滅故云觀
待然十二緣三世並備但隨化迹隱顯分三今知過
去因招今苦器今斷愛等當果不生則愚癡絕命於
慧刃愛水焦乾於智火高羅四開於六趣無生超逸
於八極矣二約大悲隨順觀治異道求中無因之見
示三際因果既先際二是中際五因中際之三是後

際二因若無如是等事衆生亦無斯因有矣何得言
無三約一切相智中當力無力信入依觀論云先中
後際化勝故謂此三際爲因義邊皆名有力爲果義
邊名爲無力若約三世前際於現五有力於當二無
力中際愛等於當有方於現無力以斯三際化彼凡
夫令信入依行化中之勝知是窮究爲種智境故前
引天親立二量爲出輪迴指南專志深研令現行心
量與之相應究竟窮種智境卽入首楞嚴三昧問七
越文中何以不言我相答各各有私卽是我相現在
愛取不得對治展轉相續乃至無窮定不能脫二十

五有故云汝勗修行要斷三惑不盡三惑縱得神通
皆是世間有爲功用若得妙發三摩提則妙常寂有
無二無無二亦滅卽觀待斷也實際云十習配屬根
隨煩惱根本有六謂貪瞋癡慢疑不正見或開爲五
隨有二十謂忿恨惱覆誑諂憍害嫉慳無慚無愧不
信懈怠放逸昏沉掉舉失念不正知散亂今媯習卽
所發之業具足貪癡詐習卽諂怨習卽恨見卽五見
枉謂逼壓良善害所攝亦瞋類訟謂相論得失忿恨
爲先惱之一法性相應故所配根隨名相甚合但舉
一種相符及兼一兼二者言僅得各造中兼及不兼

義耳經旣先標同造則知意趣在此蓋由能障之惑
一障一切障故翻障之智亦一斷一切斷一習具足
諸習始與六交報因果相應長水謂滿慈章約依報
爲首以難清淨本然今約正報爲首以難果佛唯真
實合無此七種差異又前但云從妄見生諸鈍根者
便謂都亡因果今此辨析因果昭然則知前難意顯
真諦今疑意明俗諦前後相濟方成圓子又釋二習
相然云正感果相根境兩具故云二習能觸所觸皆
是我心互相熏習結成姪業以於欲境起顛倒心生
自他樂想因此業種後感其報從其能觸現地獄身

以其所觸現諸苦具皆是自業所熏分其二習自相
刑害解雖非正修真三摩地云已離欲界入苦故云
所不能逼但是六行伏惑故云非真三昧凡真修禪
者不於三界現身意縱得勝妙定相現前了了自知
而無取著今此雖得清淨似三摩地以不了故味著
受生未究從初不知常住真心直終不戀三界皆明
卽俗之真真不離俗卽真之俗俗不離真何待前後
相濟方得圓了又前亦明衆生相續豈唯約依今十
習六交皆根境互對何止約正若知前明真諦則爲
覺不明稱爲明覺不應判爲邪矣以能所爲二習僅

得根塵和合未顯研磨不休濫瑜伽不作業業不增
長則不招報邪觀唯依不覺義修不同正觀故云非
正修真三摩提藏通別俱在所揀若不於三界現身
意不味著受生權小亦能若六行伏惑但能揀凡外
耳孤山解雖非正修真三摩地云禪有四類一有漏
禪卽今四禪也二無漏禪謂九想八背等三亦有漏
亦無漏禪謂六妙通明等四非有漏非無漏禪卽此
經首楞嚴王中道理定今云雖非正修真三摩地以
此第一揀非第四清淨心中正指初禪也諸漏不動
已伏欲惑也不知首楞嚴三昧具足二修卽攝四種

禪前三他觀第四正觀各各天人卽有漏若於捨心發明智慧卽無漏回心入菩薩乘卽亦有漏亦無漏彼之天王卽非有漏非無漏對待卽次第絕待卽圓融從邪入正依正現邪俱就機揀有漏非獨四禪四禪非獨有漏餘三句并一切法亦如是吳興云前阿難問位佛言妙性圓明云所說十二類生一往且示欲界因果之相其實界趣說而未周今答位旣終躡前妙性之義領其庶彙皆是真如發起如來委談諸趣以此觀之猶是正宗之餘慈節二師從文殊問名以來判入流通固未可也解六識造業所招惡報

從六根出云造業招報根識必俱今以識爲業而報從根者蓋業並由心報多約色故也又解此等窮空十二句云此等窮空通指凡聖欣狀未盡故云不盡空理縱是聖人修入聖種觀亦有四陰細惑未亡以未得滅受想定故從不還天下明聖人有生此處者是鈍根那含言羅漢者約後爲名也若從無想下明外道有不生此處者謂窮空不歸也外道窮空凡有二種一窮至四禪以無想爲極二窮至無色以非想爲極今旣入無想則迷於有漏無聞四空故五百劫滿自當輪轉舊解此文作外道從無想天來者非也

請觀不歸二字歸猶來也豈非無想窮空不來乎又
解七趣文未作是說者名爲正說若他說者卽魔王
說云已上說正宗分訖此下入流通分慈節二師從
支殊問名判入流通諸家竝以辨魔之文猶屬正說
至第十卷末阿難若復有人下方曰流通今觀下文
大節有二一分別魔事流行門二校量功德流通
教門經旨顯矣不知七趣則以邪觀濫入正觀辨魔
則以正宗誤歸流通全經大旨盡昧矣黏湛成根卽
是入識熏藏種子隨熟發現業非但由心報寧獨屬
色不盡空理通指聖凡那含寄四禪鈍阿羅漢寄四

空卽八萬等劫住於空定故云不回心迷漏無聞別
指無想四空諸外道天皆執苦集爲道滅不能發真
歸元故云不歸旣許外道窮非非想不應以無想獨
證窮空違諸字義矣首楞嚴定不同小乘縱滅受想
尚存行識亦非獨四陰細惑也七趣文終復指欲得
菩提要除三惑而結以正說魔說蓋應當機前文所
請欲彰五陰魔事其相甚深惟十方大覺始能洞見
故云此是過去先佛世尊云照前正觀仍躒璠璃
明月喻超路入海始證究竟安可此處卽判流通正
脉謂經後別詳初心緊要此後諸文仍是正宗然正

談三分雖亦畧言諸趣諸魔不暇詳叙恐葛藤滋蔓
支離間隔於本文故於經後詳發謂卽是如來應在
本元上本如卽性具理佛體卽修成之實謂貪戀本
趣而不求出離者俱爲內分非本趣爲外分謂純情
惟局阿鼻純想乃統諸天故知純情報狹而純想報
寬謂二習乃業習種習首二句業習所爲實事招果
之因第二句不休不止等積熏成種如是下命終之
初種習所發境是引果緣如人下取喻令驗妄理相
應二習下方言果中所受實事故皆結以諸事良以
業習具因種習發緣衆生平日恣造惡因不知能招

後苦命終復以領著境緣不達妄發由是因緣具足
豈不成辦地獄種種苦事所以文中至此皆承上言
二習相然相陵等以顯由因緣而後事辦故知下品
往生雖具苦因而火車相現急急念佛是但不領種
習所發之境緣遂壞苦事不成獄果此所謂有因無
緣卽不生又於畜生界一切異類諸類科屬下文釋
下界九品習氣俱時滅盡苦樂雙忘但引溫陵不復
欲界受生故曰不還亦名五淨居謂離欲淨身所居
也習氣思惑也與現行皆滅故曰俱盡五不還天乃
分無煩爲斷離生喜樂地九品思惑無熱爲斷二禪

定生喜樂地九品思惑善見爲斷離喜妙樂地思惑
善現爲斷除捨念清淨地思惑色究竟爲斷四空四
地中三十六品思惑又解不歸爲一味窮空更不回
心歸順聖乘無所歸托云未究上叙聖位卽不動
末而恒本今明諸趣卽不動本而恒末俱首楞嚴定
此文正承逆流詳敷其義臨末結歸圓滿菩提旣云
仍是正宗何又云經後別詳况葛藤間隔豈可以擬
圓音如來已成正覺亦不必更言本元真如也外分
輕舉內分從墜若以貪戀本趣爲內非本趣爲外正
墜三惡必不貪戀三善相望卽非本趣各各互望皆

非本趣正邪升墜何由而分純情重者更生十方阿
鼻報何曾狹純想淨者隨願生佛國何止諸天命終
果報自屬六交此中唯言惑業故云十習何得以因
濫果妄引下品往生尤爲誤證不知火車現時忽遇
善友卽過去淨業所感勝緣能發真信卽習因習果
淨種發現乃能成就現在十念初念卽習因次第九
念卽習果已成淨土報因致感淨土報果不然火車
所現色聲香味觸法正與罪人貪愛相應方且我欲
往中寧知爲地獄相生怖畏心耶有因無緣自指具
足殺心不值可殺不逢刀杖或善友勢阻故成不作

業始不招報業力甚深分時報定不定四句不同十
疑論釋十念成就依三種校量定不許作別時意趣
也十畜皆上標鬼下言類觀下人中皆以類結其旨
顯然不應以一切異類諸類科入下文九品習氣俱
時滅盡長水指欲界初禪二禪三禪各九品溫陵亦
然引溫陵所釋遺却四句致分別欲色之義不明若
唯指欲界濫同初禪非四禪那含矣五不還天若已
斷四禪惑則非捨心同分已斷四空惑則三界因亡
皆不應於四禪安立居處既譏吳興撥阿羅漢仍墮
那含何得亦墮此過按瑜伽云色界十八處謂梵衆

天梵前益天大梵天由輒中上品熏修初靜慮故少
光天無量光天極淨光天由輒中上品熏修第二靜
慮故少淨天無量淨天徧淨天由輒中上品熏修第
三靜慮故無雲天福生天廣果天由輒中上品熏修
第四靜慮故無想天卽廣果攝無別處所復有諸聖
住止不共五淨宮地由輒中上上勝上極品雜熏修
第四靜慮故復有超過淨宮天自住處有十地菩薩
由極熏修第十地云聖言量昭然自歸不歸乃正
邪二觀眼目前文殊請決卽言不知是義所歸修道
明了其家所歸道路證果旋元自歸觀陰發真歸元

經末歸無所得正對此不歸歸以得忍爲始登無上
覺爲終漸次增進卽無超次第漸轉迴向聖乘但揀
凡外何能契首楞嚴三昧

楞嚴妙指卷第八 終